

Канон апостола Андрея Первозванного, глас первый.

Песнь 1

Ирмос: *Твоя победительная десница Боголепно в крепости прославися: та бо, Безсмертне, яко всемогущая, противныя сотре, израильтяном путь глубины новосоделавшая.*

Смутившуюся мою душу помышлении же и словесы очисти всельшеюся в тя, проповедниче Христов Андрее, Божественною благодатию, яко да чисте источу ти пение достойное.

Честное, Предтеча Христов, своих учеников верховнейшее, от неплодове прозябшии, из Девы рождшемуся Христу препрославленному, Андрея, радуяся, приведе.

Желанием и любовью неуклонною добродетели степеней начен и восхождению присно поучаяся, от немощныя силы к верховнейшей, Андрее, силе достигл еси.

Богородичен: **Р**адуйся, благодати источниче; радуйся, лестнице и двери Небесная; радуйся, свещнице, и стамно золотая, и горо несекомая, Яже Жизнодавца Христа миру Рождшая.

Песнь 3

Ирмос: *Едине Ведыи человеческого существа немощь и милостивно в ней вообрази, препояши мя с высоты силою, еже вопити Тебе, Святой: одушевленный храм неизреченныя славы Твоя, Человеколюбче.*

Притекл еси, жажду не зван, Андрее, но самовольне жизни ко Источнику, якоже елень, и всем, Сего обрет, проповедал еси, и, пив, напоил еси нетления водами истаявша жажду концы.

Уведев естественныя законы, Андрее досточудне, и общника сродника приял еси, вопия: обретохом Желаемого и путесотворившаго плоти рождение, сказал еси разум духовный.

Мрежею слова из глубины прелести уловил еси словесныя рыбы, апостоле, и трапезе Христовей снедь чистую принесл еси, просвещенныя благодатию Явльшагося в подобии плоти.

Богородичен: **Б**ога заченши во утробе, Дево, Духом всесвятым, пребыла еси неопальна, понеже Тя купина, законоположнику Моисею палиму, несожженна яве предвозвести, огонь приемшую нестерпимый.

Седален, глас 8.

Яко первозванного всех учеников, и самовидца Слова, и служителя, Андрее апостоле, по долгу чтим тя, Агнцу бо, вземлюшему грехи мира, несомненною верою тепле последовал еси, отонудуже и страсти Его

общник показался еси, плотию претерпевшаго нас ради вольно смерть. Сего ради вопием ти: молися Христу Богу грехов оставление подати празднующим любовь святую память твою.

Песнь 4

Ирмос: *Гору Тя, благодатию Божию приосененную, прозорливима Аввакум усмотрив очима, из Тебе изыти Израилеву провозглашаше святому во спасение наше и обновление.*

Божественная, истребительная горшаго вседетельнаго и светозарнаго Духа сила, в тя, Андрее, всельшися Боголепне, огненнаго языка во образе, неизреченных показа тя проповедника.

Не оружия ко мщению взяше плотская и к низвержению крепких твердынь вражиих, Андрей всечестный, но, Христом оградився, принесе, пленив, языки в послушание.

Гору тя, каплющую разумное веселие, преестественный Бог, осуществивыйся еже о нас, Андрее, яви, горы горькия демонскаго возношения потребляющую силою Духа.

Любовию совершающия твою память в песнях, от обильна дара Учителя твоего, Христа, Андрее пребогате, духовнаго веселия водами исполняя не престай молитвами твоими.

Богородичен: *Поем велие и страшное Твое таинство, премирных бо утаився чиноначалий, на Тя присно Сый сниде, яко дождь на руно, Всепетая, на спасение наше и обновление.*

Песнь 5

Ирмос: *Просветивый сиянием пришествия Твоего, Христе, и осветивый Крестом Твоим мира концы, сердца просвети светом Твоего Богоразумия православно поющих Тя.*

Восприял еси, Егоже воделел еси, Андрее апостоле, в нетленных с Ним обитав селениих, трудов твоих снопы пожав достойно, темже ты песнями славим.

Возлюбил еси Владыку и Того во след быстро потекл еси, стопами Его к жизни наставляемь и страстей Того нежливо, пречестне Андрее, даже до смерти подражая.

Напряг ты, яко стрелу сильну, блаженне, испусти в весь мир Господь, ураняя демоны и злочестьем уязвленныя человеки врачуя.

Богородичен: *Веселятся Небесныя силы, зряще Тя, радуются с ними и человеческая собрания, Рождеством бо Твоим соединишася, Дево Богородице, Ты достойно славяще.*

Песнь 6

Ирмос: *Обыде нас последняя бездна, несть избавляя, вменихомся, яко овцы заколения, спаси люди Твоя, Боже наш, Ты бо крепость немощствующих и исправление.*

Море житейское преплаывая в ладии телесней, всяческая правящаго, Христа, обрел еси кормчия, всеблаженне, и к Нему, радуясь, пристал еси, Андрее всечестне.

Духи словом прогоняются, недужи бегают, душевных же страстей множество далече от недужных отгоняются данною тебе от Бога, Андрее, благодатию.

Яко волна тихая, кротким духом движимь, блаженне, изсушил еси моря лукавая многобожия Божественными струями и реки Богознания всем источил еси.

Богородичен: **В**еселятся о Тебе, Дево Пречистая, рода нашего праотцы, Едем восприемше Тобою, егоже преступлением погубиша, Ты бо Чистая и прежде Рождества и по Рождестве еси.

Кондак, глас 2

Мужества тезоименитаго Богоглагольника и Церкви возследователя верховнаго, Петрова сродника восхвалим, зане якоже древле сему и ныне нам воззва: приидите, обретохом Желаемаго.

Икос

Древле убо Давид востягает грешнаго, яко мене, поведати Божия благословне оправдания, обаче к вере учит паки и слезами множайшими изглагольствует: днесь бо глас Его аще услышите, сердец не ожесточите, яко некогда Израиль преогорчи. Наводит же прочее во псалме: Господеви вся земля воспойте, приидите, обретохом Желаемаго.

Песнь 7

Ирмос: *Тебе, умную, Богородице, пещь разсмотрим, вернии, якоже бо отроки спасе три Превозносимый, мир обнови, во чреве Твоем всецел, хвальный отцев Бог и препрославлен.*

Нелживо явственно исполнися обещание Твое, Христе, бури бо ученик Твой Божественнейший, словом запрещаая, на кроткую тишину преложи, хвальный отцев Боже и препрославленный.

На умную Сиона, апостоле, взыти гору повелен, спасения же примим чашу, радуясь, подаеши, преходя смертию к Божественной жизни, хвальнаго отцев Бога и препрославленнаго.

Тя словесную реку показа Божественная вода жизни, прелестныя реки потоки иссушающую, блаженне, проповедания и вопиющия напаяющую: хвальный отцев Боже и препрославленный.

Ты земнороден сый, апостоле, преестественно чудодействуеши, любовь бо срастворився, Тому последовал еси, возлюбившему тя Христу, хвальный, воспевая, Бог и препрославленный.

Богородичен: **Т**я Иаков, Богородице, лествицу пророчески разуме, Тобою бо на земли Превышаемый явися человеком и поживе, якоже благоволи: хвальный отцев Бог и препрославленный.

Песнь 8

Ирмос: **В** пещи отроцы Израилевы, якоже в горниле, добротую благочестия чистее злата блещахуся, глаголюще: благословите, вся дела Господня, Господа, пойте и превозносите во вся веки.

Светоносная и веселотворная луча врачеваний, Андрее, Христов апостоле, осиявает нас Божественная память твоя, вопиющих: вся дела Господня, Господа пойте и превозносите во вся веки.

Человеческое естество получив, того превозшел еси законы, и ко Ангельстей прешел еси скинии, Андрее апостоле, и зовещи: вся дела Господня, Господа пойте и превозносите во вся веки.

Еже с высоты Духа Божия дохновение тя прежде огненно просвети, ритор, Богоглаголиве, показывает тепла, вопиюща, апостоле, Христу твоему: вся дела Господня, Господа пойте и превозносите во вся веки.

Светолучен, якоже молния, во свет языков изшел еси, тьму неведения отгоня, и верная просвещая, зовущия: благословите, вся дела Господня, Господа, пойте и превозносите Его во веки.

Богородичен: **Р**адуйся, престоле славы Божия, радуйся, верных стено, Еюже Свет сущим во тьме возсия,— Христос, Тебе блажащим и вопиющим: вся дела Господня, Господа пойте и превозносите Его во веки.

Песнь 9

Ирмос: **О**браз чистаго рождества Твоего огнепалимая купина показа неопальная; и ныне на нас напастей свирепеющую угасити, молимся, пещь, да Тя, Богородице, непрестанно величаем.

Яко ученик всеизящнейший, на Кресте хотением распеншемся Владыце твоему даже до смерти последуя, возшел еси, радуяся, на высоту креста, идяй шествием на Небеса, блаженне апостоле.

Дверь Едема тебе отверзется, и предложися лествица небесная, и прияша тя небесныя обители, и предстал еси, радуяся, апостоле, Христу Жизнодавцу о мире молитвенник изящнейший.

Равными прославился еси страданьми Учителя твоего, блаженне Андрее всеумдре, крестом бо Божественный конец приял еси и причастием Бог был еси. Темже тя молим о нас присно молися.

Радуюся, двоице всеизряднейшая, на Небесех наследовавши ныне гражданство, назираете же венцев произволение, тех побеждаючи силу, и Божественных дарований просвещаете светлостьми.

Богородичен: Из корене Давидова прозябла еси пророческаго, Дева, и Богоотческаго, но и Давида яко истинно Ты прославила еси, яко рождшая пророчествуемаго Господа славы, Егоже поюще, достойне величаем.

Светилен

Слово Пребезначальное обрет тя, всеблаженне, первозванна показа всех апостолов, Андрее приснопамятне, и, Сего стопам возследую, показался еси путевождь заблуждших, к Небесному сия возводя Божественному шествию.